

COMUNICATO n. 3566 del 27/11/2025

Ägenump dar aktziong plân vor da alpinar Redjong 2035. Fokus aftz mobilitét, enerdjètege übergång un zirkolâr bichtschaft

EUSALP, atz Innsbruck dar djarege Forum atz zen djar sidar azta iz khent augelekk da Makroredjonâl Alpinar Stratedjì

[Cimbro] Sidar zen djar di simm Alpinâr Lentar Österraich, Frântscha, Beleschlânt, Liechtenstein, Slovenja un Svaitz arbatn pittnândar nâ dar Stratedjì vodar EU vor da alpinar redjong (EUSALP). An erta atz 25 von bintmânat atz Innsbruck izta khent gevairt dar denkhtage, un izta khent detzidart di stratedjì vor di zen djar boda khemmen, aftz ditza izta sa gest khent draugeredet auz pan djarege forum EUSALP, a gruntega tappa von djar vodar österraichege un Liechtensteinare vorsitzung.

In Trèff hatta genump toal dar asesór vor di politike vorz haus, schatz un demânio un zo macha khennen di Autonomì Simone Marchiori.

“EUSALP hattaz gezoaget ke di Alpm soin nèt a konfi, ma a raum boma mage stian alle, boda di lentar arbatn pittnândar zo venna soluzionen boda mang gian guat vor alle. Dar Trentino, siânka azzar iz khlumma, hatt zornìrt sin von earst momént unatarzologase vor ditza, leganteda soine kompeténtzan, soine pezzarne pratike un soi nâstian in djungen. Disa groaz arbat gemacht pittnândar übar di grentzan hattaz zuargètt z’soina hoachgeschèttz un guat zo helva vürzovüara da alpinar makroredjong. Bar schaug pitt fiducia zuar in zen djar boda khemmen, bizzante ke siânka azpar soin khlumma mabar allz ummaz gem a groaza hânt zo macha krescharn da alpinar kamòuschaft. Daz sèll boda mocht gelângen EUSALP iz hâm a grôazarna sbere politika zoa zo magase untarleng in konkrèt zo venna nâuge soluzionen vor daz sèll bodaz paitet azpe dar klima bèkslom, ’z gelearase von lentar vo pèrge, di beng, un di traspòrte, di atrativitét von alpinar lentar” asó hatta khött dar asesór in soin gruaz, gedenkhante di initziatìvan vo EUSALP boda soin khent gemacht in Trentino auz pan djar 2025, zbisnen disan dar khnopf djunge boda hâm nâgesüacht afte oportunitét arbat gepuntet pinn tèma “beldar un sachandarn pitt holtz” un dar Prais EUSALP “Daz sèll bodame haltet da” drinn in Trento Film Festival.

“Bar soin di sèlln boda schützan in alpinar raum un soin vortretar vo 80 mildjü laüt boda gehöarn atz 48 redjongen.

Ünsarz zil iz daz sèll zo sichra lem, bichtschaft, lântbichtschaft in alpinar raum”, hatta khött dar hauplântsmânn von Tiról Anton Mattle. Verte dar trèff, dar Mattle pittnândar pinn Statt untarsekretardjo Sepp Schellhorn, pinn vitze kapo von governo Sabine Monauni (Printzipàtt von Liechtenstein) un pinn Statt ministér Eric Beißwenger (bairesche Statt kantzlerai) hatt gezoaget baz un benn ’z bartnda khemmen gemacht di sachandarn in di djar boda khemmen pinn nâuge aktziong plân EUSALP. Dar plân schupft zo haba no a stercharna mittarbat in stratègesche sektör azpe di mobilitét, da enerdjètege übergång un dar zirkolâr bichtschaft. An ândadar hauppunkt vodar vorsitzarung EUSALP 2025 iz machan nemmen hèrta mearar toal in djungen in sèll boda khint getânt. In gântzan 500 laüt un zbisnen disan 200 studjènt hâm

genump toal in progråmm zo riva aftn djarege forum. Häüt dar Rat von djungen, gemacht vo 28 djunge boda zuarkhemmen von alpinar lentar iz in gântzan toal von struktùrn EUSALP. Dar djarege forum vallt pittnândar pittar bèkslom vodar vorsitzarung vo EUSALP. Dar bairesche minister Eric Beißwenger hatt genump in “Kolo Wheel” a riprodutziong vodar eltarstn rodl pittar schill vodar bèlt, simbol vodar alpinar kooperatziong.

Übarsetzt von Schaltarle vor di zung von Toalkamou vodar Zimbar Hoachebene

(cdt)